

L'absence me seroit encore supportable si i'auois moyen de pouuoir au moins au bout de quelque temps sçauoir de vos nouvelles: mais depuis mô despart de France la fortune m'a este si contraire que ie n'en ay iamais sçeu receuoir, & ne puis aucunement sçauoir de vostre portement ni de vostre estat, sinon.

5.

par imagination, & ie sçay bien que ces imaginations me trompent; cela seroit vn nouveau charme pour raffreichir l'ardeur de mes desirs: mais puis que mon infortune le me desnie, si mettrayie encore ceste-cy aux champs sous la conduite du hazard, tant pour vous aduertir de l'estat de la nouvelle France, que pour vous prier de nous en faire tenir de l'ancienne, & si quelque bon vent la peut porter en vos mains, ic vous prie d'y remarquer les traicts de mon affection, & de prendre en gré ce peu que ie vous enuoye de ce qui se passe ça bas, attendant que les histoires en seront tracees au long pour vous en certifier avec plus l'assurance.

Vous devez donc sçauoir que depuis nostre depart de la Rochelle, qui fut le 13, d'Auril 1604, sous la conduite du Sieur de Bricant, autant experimété Capitaine tant sur mer que sur terre (comme les effects en ont fait paroistre la verité) qu'autre que ie sçache auoir cogneu tant par reputation qu'autrement, nous cinglames en haute mer, & flotrasmes avec vne bonnace assez favorable insques le vingtquatriesme dudit mois sur les deux heures apres midy, que nous trouuant pres les isles de Maida, enuirõ sous le 3. degré de lögitude, & le 24. de latitude, il se leua vn certain vent de Nordest assez violent & fascheux avec certains orages & tempeste, qui commencerent à escarter nos vaisseaux, & à faire sousleuer les ondes de telle furie que nous pensions entiere-ment estre tous perdus, & que nostre sort nous auoit là tous amenez à vn general naufrage: mais Dieu qui reseruoit nos

6.

vies à des occasions plus glorieuses, nous monstra qu'il en auoit autrement arresté au parquet de sa diuine Iustice, car apres que les vents & la tempeste eurent escumé leur malice enuiron deux heures durant, voilà que sur les quatre heurs de soir, ils calmerent entieremêt leurs agitations, & firent rasseoir les vagues: & alors nous commençames à descourir les Isles, & nous y retirasmes pour y reprendre haleine, & nous rafreschir trois jours durant, tant pour attendre quelques vns de nos vaisseaux qui estoient escartez, que pour rabiller deux de nos nauires qui s'ouuroient par les flancs à cause des grandes secousses qu'elles auoient soustenuës.